



Ольга БОРОДИНА,
«Кенеш» журналысь редактор-стилист,
писатель

БИБЛИОТЕКАЛЭН БУРДУАЗ

«Писатель но библиотека» — озы нимазы Йёскалык лыдзетьюртын ужасьёс шаерысьтымы библиотекарьёс кустын радъям котырес жёк съёрын вераськонзэс. Валтйез эскероно ужпумзы — кызы шаерысьтымы лыдзиськонниос удмурт гожьясьчиослэсь творчествозэс калыке вёлмытон бордын тыршо. Ужрад ортчиз тодмо удмурт писательлэн Вячеслав Ар-Сергилэн куатътон арес тырмон юбилееныз валче.

Пумиськонлэн кутсконаз ик ялэмын вал шумпотымон ивор: Дэри ёросысь Виль Казьмас библиотека табере нуллоз аспал адямиезлэсь — Вячеслав Ар-Серги писательлэсь — нимзэ. Озыен, эшшо одйгез лыдзетьюрт рос-прос ужалоз удмурт писательлэсь книгаоссэ лыдзисьёс доры вуттон, улон сюрессэ котыр ласянь эскерон-возматон бордын. Чапак озы, кызы туннэ ужа шаерысьтымы 521 библиотекаос пöлысь дас витез: сомындаез гинэ нуллэ уго удмурт писательёслэсь нимёссэс.

Котырес жёк съёрын та ужпумъя вераськызы Кедра Митрей нимо Эгра шор ёрос библиотекаын,

Эгра ёросысь ик Пётр Поздеевлэсь нимзэ нуллысь Кабачигурт лыдзиськонниын но Ижкарысь Флор Васильев нимо библиотека филиалын ужасьёс.

Эгра шор ёрос библиотека Кедра Митрей писательлэсь нимзэ 1998-тй арысен нуллэ. Но аспал писательзылэсь улон но ужан сюрессэ эскерон бордын лыдзетьюрт кемаласен ужани, шуэ ёрос лыдзиськоннилэн валтйсь библиотекарез Ольга Степанова. 1980-тй арьёслэн пумазы ик ини радъямын вал Кедра Митрей нимо лыдзёньёс. Та дырозь кылдытэмын Кедра Митрейлэн выжы писпуэз, люкамын трос архив

материальёс. Нош 2017-тй арын усътэмын писательлы сйзем пичи-як музей-висъет.

Котькуд ар (дас вить ар чоже ни) писательлэн вордйськем нуналаз ёросын ортче удмурт кыл-бурьёсты лыдзисьёс кустын «Жильыртэ Кедра ошмес» конкурс. Кылем арын со вожвыльяскем паськытаз — отчы быдэс Удмуртиысь но Татарстанысь лыдзисьёс онлайн пырыськызы. Та ужрад Кедра Митрейлэсь 130 арьем юбилейзэ пусьён азын нимысьтыз радъямын вал.

Ёрос библиотека писательлэсь нимзэ калык пöлы паськытгес вёлмытон вылысь ялан но ялан виль ужан амальёс учта.

— Лыдзиськонниын экскурсия ортчытэм сяна, ми дорамы

лыктэм калыкез нимысьтыз маршрутъя нуллыськем на: тодматйськем Кедра Митрейлы 1992-тй арын 100 арьем юбилеезлы сйзъыса вордйськем юртэз интые пуктэм синпельметэн, писательлэсь нимзэ нуллысь урамен (солэсь историзэ мадэ урамысь нырысетй ульсьёс Раиса но Николай Трониньёс), Кедра ошмесэн. Сое Кедра выжылэн ошмесэз шуыса кемаласен тодо ни — пырак Эграе пырон дорын ик бызе. Пичи Митрей но, малпаскем, та ошмесэ ветлэ вал, дыр, ошмес жильыртэм улсын ик, оло, нырысетй кылбур чурьёсыз но кылдйзы. Озы ик одно дугдылыськем на валэн почта нуллысьлы (ямщиклы) пуктэм синпельмет доры, уго писательлэн айиз ас вакытаз та ужез быдэсьям, — аспöртэм турмаршрутсы



Эгра каргуртысь Кедра Митрейлы сйзем синпельмет дорын — элькунысьтымы лулчеберет но гожьяськем удысысь ужасьёс.

сярысь ужрадэ люкаськем библиотекарёслы пыр-поч мадиз Ольга Александровна.

Кедра Митрейлэсь ужзэ азылантьиёс ёросын тросгес медлуозы шуыса, «Удмурт Кенешлэн» Эгра ёросысь ёзэтэлэн кичёлтэмезья ёросын Кедра Митрей нимо премия кылдытэмын. Со 2008-тй арысен сётиське удмурт кылэз, литератураез, лулчеберетэз, сям-йылольёсты азинтон удысын бадзымесь вормоньёс бастэм муртьёслы, огазеяськоньёслы. 2018-тй арын та премиез ёрос библиотека бастыиз.

Эгра лыдзетьюртлэн даньяськонэз – Интернет вотэсын кылдытэм Эгра ёроslэн литература мутусэз (картаез). 2015-тй арын

быдэстэм ужзы туж выль дуньямын вал: со Россиясь ёрос литератураослы сйзем тужгес умойёсыз мутусьёс пöлы сюриз.

1998-тй арын ик Эгра ёросысь мукетызлы – Кабачигурт библиотекалы – аспал адямизылэсь Пётр Поздеев писательлэсь (улэп дыръяз ик ай) нимзэ сётйзы. Татчы но земляксылы сйзем сэрег усьтйзы, Пётр Кирилловичен матысь кусыпёс тупатйзы.

Кабачигурт лыдзетьюртлэн кивалтйез Елена Корепанова котырес жöк сьöры люкаськемёслы озы ик мадиз писателен тодматйсь ужрадъёсы сярысь:

– 2017-тй арын библиотекаен радъямы «Кытчык доры куное» дышетскон турмаршрут.



Эгра ёросысь Кабачигурт библиотекаын Пётр Поздеев писательлы сйзем сэрег.

Гордкушман сюкасен но милымен пумитало нылпиосты Пётр Поздеевлэн калыкысь гожтэм пöллиськоньёсыстыз Иван но Кытчык, соос куноосты öтё писательлэсь улонзэ, гожьяськон быгатонлыкэсь возьматйсь висьетама. Пинальёс ваньзэ тае адзыса лöпто: писательлэн машинкаеныз печатланы выро, чернилаен, пероен гожьяськыны йöндыро, нош собере мадиськоньёслы валэктон утчало, удмурт эктоньёсты дышето, вашкала удмурт шудоньёсын тодматско-шудо. 2020-тй арын, писательлэн вордйськем нуналэзлы сйзьяса, «Пётр Поздеевез чöш лыдзиськом» флешмоб «ВКонтакте» вотэс бамын ортчытйм. Пöртэм арлыдо лыдзисьёс отчы

пыриськызы. Нош кылем арын, писательлэн 90 аръем юбилеяз, Интернет вотэсын ик «Мон – тылси, шундылэн мон пиез» онлайн-марафон радъямы. Ужрадэ пыриськисьёслы ньыль пумо конкурс пыр орточоно вал: «Визьпогъёс» – Пётр Поздеевлэн творчествоезья юаньёслы валэктон сётон; «Лыдзиськом Поздеевез шара» – писательлэсь кылбурьёссэ лыдзöно; «Усто суредась» – писательлэн произведениосызья суредъёс лэсьтоно; «Кылась-бурась» – кылбур гожьян удысын быгатонлыктэ эскероно. Та ужрадэ, Эгралась сяна, пыриськызы на Шаркан, Пичи Пурга, Алнаш ёросёсысь но Ижкарысь лыдзисьёс. Озы ми выль сямен



Надежда Старкова, Татьяна Малых, Вячеслав Ар-Серги но Рафаил Дюкин «Вортча мадьёс» книга бордын ужакузы.

тыршимы писательлэсь творчествозэ тросгес лыдзисьёс пöлы вöлмытыны.

2015-тй арын Ижкарись одйгезлы библиотекалы (со Азинлэсь нимзэ нуллэ вал) удмурт писательлэсь Флор Васильевлэсь нимзэ сөтйзы. Со дырысен лыдзиськонни Ижкарын удмурт лулчеберетья, шаертонья но литературая юртылы пöрмиз. Библиотекалэн удмурт лулчеберетья но шаертонлы сйзем литературая ёзэтаз ужасылэн Виолетта Анисимовалэн верамезья, лыдзетьюртын котьку ужа Флор Васильевлы сйзем адзйтон, ортчыло солы сйзем лыдзёньёс, вордйськем нуналэзлы тупатэм ужрадъёс. «Культура» йöскалык проектлы лубыса, кылем арын лыдзиськонни «модельной» инлык (статус) басьтйз. Таин валлин библиотекалэсь ужзэ табере пöртэмгес, узыргес карыны юрто виль технологиос. Одйгез туэ ортчытоно ужрадзы библиотекарьёслы тужгес тунсыко йöтйз: со Флор Васильевлэн кылбурёсызья кылдытэм буктрейлерёслы* конкурс.

Библиотекаос, лыдзисьёссэс тодмо писательёслэн творчествонызы тодматэм сяна, бадзым саклык висьяло на самостоятельной гожьясьёслы, нош соос котькуд

* Буктрейлер – кыче ке произведение яке книга сярысь верасьмадись вакчи гинэ (чөмысь куинь минутем) чеберлыко видеоролик.

ёросын, котькуд гуртын одно ик луо. Тани Дэри шор ёрос библиотека бордын 2011-тй арысен ужа ни гожьяськисьёслэн «Вдохновение» студизы. Со огазая быдэс ёросысь пöртэм арлыдо адымиосты, кудъёсыз, литератураез пумтэм яратыса, асьсэос но гожьяськыны кутско.

– Студилэн ужал пырыськисьёс, яратоно писательёсылэн произведениоссы сярысь вераськем сяна, ог-огзылы асьсэлэсь гожтэмьёссэс но лыдзё, ог-огзылы дэмланьёс сөто, мылкыдзэс усъто, – шуэ Дэри шор ёрос лыдзетьюртлэн кивалтйсьезлэсь ужзэ быдэсьясы Евгения Сабленко. – Нош ми, библиотекаын ужасьёс, тыршыськом соослэсь творчествозэс мукетьёсызлы но возматыны. Тани 2018-тй арын студие ветлйсьёс ваньзы пырыськызы калык творчествоя «Окно в небо» X калыккуспо фестиваль-конкурсэ. Соослэн гожтосьёссы потйзы самостоятельной авторёслэн «Под чистым небом фестиваля» сузьетазы.

Нош балезиноос та ласянь ваньзэс азыпалтйзы, шуыны луоз. Балезино ёрос библиотекаын 2018-тй арысен «Литературный квартал» проект улсын ортчыло гожьяськись землякёсынызы тодматйсь пумиськоньёс. «Литературный квартал» котыраз трос авторёсты, книгаез яратйсьёсты люка.


– Ас кылбурёссэс, веросьёссэс калык азын лыдзём сяна, авторёслэн ужьёссэс книгаен

но адзёмзы потэ, – шуэ Балезино ёрос лыдзиськоннилэн одйгеныз ёзэтаньыз кивалтйсь Екатерина Наговицына. – Книгапоттонниосы вазиськоно ке, печатлам понна укыр трос коньдон куро, пичигес тиражен поттоно ке, озыы эшшо но дуногес усё. Соку ми авторёсмылы юрттоно кариським. «Знакомьтесь, балезинская книга» проект малпамы. 2019-тй арын САФМАР зечлэсьтон фондлэн (учредителез – «РуссНефть» компания) мер проектёслы конкурсаз пырыськымы но вормымы. Утэм коньдонэнымы книгаосты пичи тиражен поттыны луоно печатлан техника басьтйм. Табере даньяськыны быгатйськом ни асьме дорын поттэм книгаосынымы. Кылем арын печатламы Надежда Перевощиквалэсь веросьёсын «Отись шунды сиос» бичетсэ, Турецкое гурт лыдзетьюртысь библиотекарьлэсь Елена Наговицыналэсь «Турецкое – росинка малая» книгаез но Удмурт Элькунысь лулчеберет

удысысь дано ужасылэсь Галина Сысоевалэсь «Быльыра ошмесин» кылбур но проза бичетсэ.

Мукетыз сярысь но сюлмазьком библиотекаын тыршысьёс: библиографияя пособиос – каталогъёс, картотекаос, указательёс – дасяло-потто. Та удысья синмаськымон ужа Глазкарись В. Г. Короленко нимо лыдзетьюрт. Лыдзисьёс татчы туж чөм вазиськыло Глаз пал авторёслэн ужьёсынызы тодматскон вылысь, соин ик библиографилы сйзем тодэт книгаослэн кулэлыксы туж бадзым. Озыы 2010–2014-тй арьёсы библиотекаын ужасьёс дасзызы ни вал «Олег Поскрёбышев но Глазов», «Владимир Короленко но Глазов», «Флор Васильев но Глазов» тодэт книгаосты (указательёсты).

Глазкарись В. Г. Короленко нимо лыдзетьюртлэн информационно-библиографической юрттэт сөтонья ёзэтэлэн кивалтйсьез Татьяна Чиркова котырес жöк сьöры люкаськемьёслы мукет ужьёссы



Дэри шор ёрос библиотека даньяське аспал гожьясьчиосыныз.

сярысь но мадиз. 2015-тй арын, кылсярысь, библиотекаын ужасьёс библиография «Литературный Глазов» нырысетй электрон тодэт книга лэсьтйзы. Отчы пыризы Россиясь но Удмуртиысь писательёслэн огазеяськоньёсазы кутэм Глазкарысь писательёс: Вячеслав Захаров, Александр Мартьянов, Майя Московкина, Леонид Смелков но Эвелина Цегельник. Указательын пусьмын писательёслэн пöртэм интыосын печатлам произведениоссы но соос сярысь газет-журналёсын, книгаосын гожьямёс. Вуоно араз тодэт книгалэсь кыкетй люкетсэ поттйзы, ваньмыз отчы тямь писательёс сюризы.

Нош Яр ёрос библиотекаысь методист Татьяна Малых люкаськемьёслы мадиз бесерман кылын «Вортча мадьёс» книга бордын ужамзы сярысь:

– Библиотекае ёрос газетлэн валтйсь редакторез Ирина Иванова жингыртйз но доразы Вячеслав Ар-Серги писателен но Яр ёросысь бесерман дэменлыклен кивалтйсеныз, бесерман кылбурчилэн Михаил Федотовлэн чыжы-выжыеныз Рафаил Дюкинэн пумиськыны öтиз. Соос, пе, бесерманьёс сярысь бичет поттыны малпало, бесерман кылын та нырысетйез книга луоз. Ваньмыз, пе, люкамын ни, тйледлы текстэз бичаны гинэ кулэ на. Нырысь

учкыса, зэм но номыр секытэз öвöл кадь, нош көня курадзим. Уж борды кутским но, ум тодйське, кызьы созэ я тазэ кылэз гожтоно, бесерман кылья нокыче правилоос но, кыллюкамьёс но öвöл ук. Кема спорьяським, но огкылэ вуим ик. Асьмеос но öм валалэ, кызьы бесерман письменность кылдытон уже пырыським. Вераны луонтэм бадзым уж лэсьтйм.

Ужрадэз йылпумяз писатель Вячеслав Ар-Серги, со мадиз, кызьы вить аресказ библиотекаен, книгаосын нырысьсэ тодматскиз но азыланяз соосын ноку но öз люкиськылы ни.

Котырес жöк сёрын вераськон возьматйз, макем бадзым уж нуо библиотекаын ужасьёс писательёслэсь гожьямьёссэс лыдзись доры вуттон понна. Нош гожьяськисьёслэсь нимьёссэс нулльсь лыдзетьюртьёс эшшо но бадзымгес уж ас вылазы басьто: соос писателез быдэсак бурд улазы пырто, шуыны луоз. Лыдзисьёс та библиотекаосы книга понна гинэ уг вამышто, соос писатель доры лыкто: соин пумиськыны, тодматскыны, кенешыны. Писательлэсь нимзэ нулльсь лыдзетьюрт, чаклано ке, гожьясьчылы зэмос улэп, нуналмысь ужась синпельмет кадь луэ. Таچهосыз шаерамы тросгес медлуозы вылэм.

УДМУРТИЫСЬ ТАЧЁ ЛЫДЗЕТЪЮРТЪЁС УДМУРТ ПИСАТЕЛЬЁСЛЭСЬ НИМЪЁССЭС НУЛЛО:

- Ижкарысь библиотека-филиал – Пётр Блиновлэсь;
- Ижкарысь библиотека-филиал – Филипп Кедровлэсь;
- Ижкарысь библиотека-филиал – Флор Васильевлэсь;
- Можга карысь – Николай Байтеряковлэсь;
- Кватчи гуртысь (Можга ёрос) – Григорий Даниловлэсь;
- Вуж Какси гуртысь (Можга ёрос) – Даниил Яшинлэсь;
- Ува шор ёрос библиотека – Пётр Блиновлэсь;
- Октябрьской черкогуртысь (Дэри ёрос) – Алла Кузнецовалэсь;
- Пичи Пургалась шор ёрос библиотека – Семён Самсоновлэсь;
- Укан черкогуртысь (Яр ёрос) – Флор Васильевлэсь;
- Эгра шор ёрос библиотека – Кедр Митрейлэсь;
- Сэп гуртысь (Эгра ёрос) – Афанасий Лужанинлэсь;
- Кабачигуртысь (Эгра ёрос) – Пётр Поздеевлэсь;
- Адам гуртысь (Глаз ёрос) – Ливий Ураковлэсь;
- Дэбес ёрос библиотека – Степан Широбоковлэсь.

Дэри шор ёрос, Эгра шор ёрос, Эгра ёросысь Кабачигуртысь, Ярысь шор ёрос библиотекаослэн архивысьтызы туспуктэмьёс